

四庫全書

集部

欽定四庫全書

集部

此山詩集卷一
一至五

詳校官中書臣李彤

侍讀臣孫球覆勘

總校官編修臣王燕緒

校對官檢討臣李學錦

謄錄監生臣郭鴻

欽定四庫全書

集部五

此山詩集

別集類四元

提要

臣等謹案此山詩集十卷元周權撰權字衡之號此山處州人嘗游京師以詩贄翰林學士袁桷桷深重之薦為館職竟報罷然詩名日起唱和日多集中有贈趙孟頫詩云辦香未展師道敬攜琴暫出松蘿中贈虞集詩云遠

遊非涉聲利途願謁國丈開榛蕪贈揭傒斯
詩云嗟予觀光老賓客辦香仰止懷生平贈
陳旅詩云下榻清風延孺子高樓豪氣卧元
龍贈歐陽元詩云牀頭萍綠多矜色長價還
從薛卞門贈馬祖常詩云絕憐白髮南州士
山斗彌高獨仰韓而趙孟頫贈權詩亦有青
青雲外山炯炯松下石顧此山中人風神照
松色之句且親寫此山二字為額以贈是時

文章耆宿不過此數人而數人無不酬答似
權亦聲氣干謁之流然孟頫等並以儒雅風
流照映一世其宏獎後進迥異於南宋末葉
分朋標榜之私故終元之世士大夫無鉤黨
之禍權與諸人款契蓋文字之相知固未可
以依門傍戶論也是集為陳旅所選定旅及
袁桷歐陽元等各為之序揭傒斯又為之跋
旅本作者故別擇特精旅序稱其簡淡和平

無鬱憤放傲之色楠序稱其法蘇黃之準繩
達騷選之旨趣元序稱其無險勁之詞而有
深長之味無輕靡之習而有春容之風今觀
其詩元所稱尤為知言矣乾隆四十六年十
月恭校上

總纂官臣紀昀臣陸錫熊臣孫士毅

總校官臣陸費墀

此山詩集原序

詩有經緯焉詩之正也有正變焉後人傳益之說也傷時之失溢於諷刺者果皆變乎樂府基於漢實本於詩考其言皆非愉悅之語若是則均謂之變矣建安黃初之作婉而平羈而不怨擬詩之正可乎濫觴於唐以文為詩韓吏部始然而春容激昂於其近體猶規規然守繩墨詩之法猶在也宋世諸儒一切直致謂理即詩也取乎平近者為貴禪人偈語似之矣擬諸採詩之官誠

不若是後蘇黃傑出遂悉取歷代言詩者之法而更變
焉音節凌厲闡幽揭明智析於秋毫數彈於微眇詩益
盡矣止矣莫能以加矣故今世作詩者咸宗之括蒼周
君衡之磊落湖海士也東書來京師以是編見贊意度
簡遠議論雄深法蘓黃之準繩達騷選之旨趣歷覽名
勝長歌壯吟亦皆寫其平生胸中之耿鬱至於詞筆尤
為雅健讀之疊疊忘味誠有起予者乃知山川英秀之
氣何地無竒才感歎之餘因書此以贅其卷首延祐六

年閏八月庚申前史官會稽袁棟序

風雅頌不作詩之變屢矣大抵與世相為低昂其變易推也近世為詩者言愈工而味愈薄聲愈號而調愈下日燬月煉曾不若昔時閭巷美刺之言世德之衰一至於此哉我國家以淳龐雅大之風丕變海內為治日久山川草木之間五色成文八風不姦士生斯時無事乎文章而其言自美况以文章而歌詠雍熙之和者乎此山周先生自枯蒼來京師訪余靈椿寓舍與語竟日知能為詩因索其所作觀之何其言之藹如也夫志得意

滿者其詞驕以淫窮而無所寓者其詞鬱以憤高蹈而
長往者其詞放以傲先生懷材抱藝蚤有意於用世既
而託跡丘園不見徵用且老矣今考其詩簡淡和平無
鬱憤放傲之色非有德者能如是乎傳曰溫柔敦厚詩
教也先生可謂有溫柔敦厚之德矣余官橋門七年凡
四方文字當程校者莫不與寓目焉嘗疑山林間必猶
有可觀者未之見也此詩蓋山林之礪礪而余所未見
者乎故閱之不能去手因為選其最佳者得若干首題

為此山先生集云登仕郎浙江等處儒學副提舉陳旅
序

此山詩不但簡淡和平而語多奇雋余為校選故能深
知之比翰林袁學士以其才堪充館職力薦諸朝吾
恐此山不能遂肥遯之樂也旅又序

枯蒼周君此山初以四明袁文靖公薦選預館職君雅志冲挹垂成而歸乃得肆力於辭章所為樂府歌行大篇小章古律近製衆體畢具往往多可誦之句頃國子生葉敬常攜其編詣余評之余愛其無險勁之辭而有深長之味無輕靡之習而有春容之風因謂敬常曰周君其溫然有德之士乎他日君乘小車來過余體充而氣龐神腴而言揚此其蓄於內者厚發於外者闊若合符契或曰能詩者不必有德有德者不必能詩君於周

君何以因言而知人若著蔡耶余曰不然古之人聞樂以知政詩與樂同出一初皆感於性情而動於聲音者也因詩以知人蓋文士之通技也抑余不獨因是以知周君之生平且有以觀世尚矣宋金之李詩之高者不必論其衆人之作宋之習近亂斲金之習尚號呼南北混一之初猶或守其故習今則皆自刮剝而不為矣世道其日趨於盛矣乎雖然昔者子貢問子石何不學詩曰父母求我孝兄弟求我悌朋友求我信何暇哉子貢

曰捐吾詩學子詩矣若周君則有是三者而從事於詩者也其孰能過之因志余之說於是元統二年八月初吉翰林直學士中憲大夫知制詔同修國史廬陵歐陽玄序

僕既序復見詩集留莆田陳君處陳為之精選又倍神采焉僕因致點校之助於其間云歐陽玄識

欽定四庫全書

此山詩集卷一

元 周權 撰

五言古詩

擬古

洪鈞播無垠八埏蕩和風枯叢同華滋陳荻變纖草高
門與窮巷無媚白與紅陽和不擇地化育自至公惟人
物之靈此理均降衷大樸自凋喪町畦生室中貴賤移

親疎貧富乘始終誰能返其初物我俱玄同

東溟躍羲和西海騁望舒迭運不遑息汲汲司晨晡人
生百年間有如涉長途途長日苦短何以寧其軀白露
沾我衣衆芳忽萎枯逝將躡飛霞駐景凌方壺

黃河天際來噴薄萬里奔寸膠使之清意堅水彌渾誰
抱綠水操乃向齊門彈奈何殊所投舍彈起長歎

有客山中來遺我千歲苓膚腴淡無味色素少芳馨且
言養真性服久能身輕膏梁匪吾有終焉佩高情

朝菌迷晦朔大椿閱春秋鶴長斷則悲鳧短續亦憂人
生貴委順賦予不可求永惟南華篇達人諒悠悠

偃蹇澗底松婀娜原上柳春風少年姿輝映蒼髯叟俗
情厭孤直艷目分好醜徒抱霄壑姿落落誰見取競把
黃金絲送盡行人酒一夕秋霜飛柔條化枯槁懷材貴
適用貞脆不同道誰為歲寒人共賞歲寒操莊周夢為
蝶蝶夢亦蘧蘧子綦吾喪我隱几何嗒如忘形與忘情
一念非異途作夢未必真似喪良非無垢盡見自明白

生室乃虛忘言對青山悠然雲卷舒

山中有孤松託根在深澗磊磊多節目偃蹇歲云晏豈
無干雲心亦有傲雪幹蕭颺起清奏可挹不可玩大雅
久寂寥古瑟絃已斷美哉遺音存佇立為三歎

讀陶淵明傳

淵明任疎散出處皆逍遙悠然解縣組不折五斗腰晴
川風日佳歸舟喜搖搖及門對妻子不覺衣囊朽居貧
道則腴念澹迹已超時復會田家興至不待邀種豈在

南山種苗在東臯投閒偶成趣心逸身匪勞孤懷託素
琴萬事付濁醪樂天以乘化內適何陶陶若人渺何許
世遠不可招千載東籬花寒香翳叢蒿采采不盈掬佇
立秋風高

田家辭

生長畝畝中稼穡少已諳既壯忽復老支羸謝鋤艾小
舟杙斷溝雞鳴松樹簷農閒子于菟春至婦亦蠶出門
無遠途一室常團樂所期年歲登更願官府庶官污歲

復歎我突何由歎

籬畔白板扉牆頭烏柏樹負暄鶴髮翁衣綻紉老嫗羣
兒嬉翁前下壯入場圃忽聞新詔下昨日減租賦比隣
喜津津手額遞相語悍吏無叫囂晏然處環堵豐年樂
無涯況乃生樂土牀頭酒新篘前邛蹇神鼓

紫鳳吟

楚客青綺裘售我紫鳳圖且言觀祥瑞與子懸座隅裴
回感客意因以致我辭不能鳴朝陽高翔碧梧枝惜哉

五章備乃向縑素施我圖已在禍顛倒隨天吳殷勤謝
客去玩目非所娛

古樂府

妾有嫁時鏡皎皎無纖滓照妾芳華年塗澤如花美郎
行向天涯歲月忽逾紀空閨生遠愁妾容為誰理妾容
匪金石寧復昔時比重拂故匣看炯炯光不巳人情重
顏色反目如覆水願郎待妾心明與鏡相似

二

娟娟天上月，乃有盈與虧。區區世間人，寧無別與離。月
虧尚有盈，君別無回期。月胸重可待，君信不可持。灼灼
紅槿花，落落青松枝。單居無與儔，貞白徒自知。人生良
鮮歡，乃復長相違。托婚昔未久，幸無兒女悲。妾心有姑
嫜，君忘倚門思。川長舟可逝，路遠車可馳。人情不如月，
素光流妾幃。

原上楓

青青原上楓，春至揚柔葉。雨餘似膏沐，幽蔽深澗合。昨

日原上行寒林淨如削此時澗中松偃蹇晚冰雪

古別離

天河限東西經歲別女牛社燕辭歸鴻亦背春與秋人
生苦離別別多白人頭十年阻江漢音問何沈浮豈惟
腸九迴輪轉日萬周君看江頭水東去無回流君看山
上雲來往任悠悠

牧童辭

我牧不憚遠牧多良苦辛所幸牧已狎馴擾無敗羣平

金天口石合書
卷一
原濕春烟碧草何披紛
大牛隱重坡小牛飲芳津
旦出露未晞及歸景常曛
時復扣角歌歌俚全吾真
取樂田野間世事非所聞
歌闌臥牛背仰見天際雲

古塞下曲

朔風號枯榆厚地凍欲裂
大漠無人行長空欲飛雪
陰陰古長城野燐明復滅
草死沙場空飢鳥啄殘骨

桃柳詞

灼灼絳桃花裊裊黃柳絲
風流少年場妖冶不自持
春

風日夜變點拂飛故枝飄紅惹飛絮流水同天涯美人
麗南國蘭蕙薰柔姿青春妬娉婷笑盼生光輝素絲感
清鏡朱粉難為施奈何桃柳質歲晏徒傷悲

東林行

意行忘遠趣所詣欲登仙絕峽下蒼黑半壁懸銀泉峯
回路不定曳杖聊黃緣延流忽舒曠楮楠影翩翾恬目
霽孤墅洗心玩芳荃永晝無樵斤芳洲愜鷗眠幽迴人
境異似與隱者便巖花映石瀨漁舟起孤烟

懷別

青桑蔽繁陰玄鳥春將暮東風老松花長林翳黃霧
俛首事鉛簡流光暗中度淮水日夜流美人渺難晤
賓鴻盡北歸誰與達書素長歌復徘徊晴川渺烟樹

暮春

衆芳麗春輝天冶眩紅紫紛紛兒女情園香醉羅綺
笙簫夜鳴鳴申旦歡未已鷓鴣何處鳴繁華總流水
誰知搖落時可以觀物理

徐山民隱居

高人寡朋徒乃與世遠隔廓然方寸中不受外物役重
林出新構衷廣意所得材全不雕樸墻巧不加白素琴
與芳茗賓至適所適簷枝戛雲浮蕙蘿自駢織朱明景
長晦悄愴過幽閒石寒水愈清寸寸落秋色神淒不可
留題詩記崖壁

天竺古桂

幽幽祇園樹色界閔寶坊粲粲庭下桂秋光何煒煌道

人外芳芬鼻觀無來去妙意了忘言坐久雲生樹

紀夢

夜爐翳紅金玉蟲隨玄煤嗒然據槁梧一適何悠哉冷
風渺真趣寶界開瓊瑤彷彿蓬瀛珠宮映瑤臺飛簷
翼丹碧複砌明角圭仙姝粲華星靚服紛素霓雙吹紫
鸞笙勸我白玉杯為我洗塵穢層襟雪崔嵬空明遡高
寒雲影相徘徊清詩吐竒怪可諷不可題覺來已忘言
月在枝南梅

遊山寺

空林淨如掃石徑穿嶺細紺廬出深樹飛湍下雲際偶
逢赤髯侶囑我聽真諦菘肥齋鉢豐越古佛燈翳週簷
棘籬短野枳香入袂夕磬兩三聲半岩花雨霽

客中贈別

雪晴水生波有客繫遊鷁語離江上亭亭宇虛且寂老
栢瘦入節色古根似石微陽麗木末春意動寒碧莫嫌
市酒薄贈子秦人策去去曷自將子身貴圭璧

濯足

投跡處田野野僧日相親
晝暮松下石夜榻山中雲
流水何處鳴澗芳漱餘春
濯足坐芳澗浩歌復誰聞

溪之濱

小雨淨川綠玩心鷗鳥羣
拂蘚憩幽磴松花點衣巾
禪局杳何處疎磬時遠聞
青烟濕山道牛羊下斜曛

春暮

春暮適川上意與流水長
時有白雲至遠帶松翠香
手

攜淵明詩倦坐據繩牀悠然宇宙間是非兩忘羊

荷亭名清遠託意數語

養素任踈拙卜亭類蝸盤俯茲一酌池湫隘良可歎誰
知方寸中而有萬頃寬天光發虛白心湛水不瀾彼美
君子華寓目道所存風細晨氣潤月澄夜香寒吸香噉
沆瀣光霽融肺肝興寄言莫寫念適趣自閒永懷愛蓮
翁時復一凭欄

憫蔬

富人厭粱肉貧士懷糞鹽采芳得野薺終朝不盈襜矧
茲春候和學圃濱澗南席地歷疎塊墨畦理長鏡孫芥
紫芳茁早韭綠且織亦復種晚菘穉角俄已含期此旦
夕效菜把日可添時陽忽久亢生意幾不堪豈憚抱瓮
勞濯沃終難霑馬齒一何茂縱逸徒爾艾所憂穀不登
饑饉今乃兼矯首向昊昊霖澤何由覃

此山詩集卷一

欽定四庫全書

此山詩集卷二

元 周權 撰

五言古詩

來故人

東林旦氣白清旭含初景空齋松桂幽光動離離影俄
聆剝啄音車馬何炳炳我本黜世慮脫落如廢井屏跡
謝時彥兀坐息造請喜茲共蕭閒妙論得新警夜涼月

滿川中流嘯烟艇餘音嫋秋風清興與川永

仙源

桃花悄無有仙源渺何許流水清於銅松色與崖古長
林暮蕭颯似與幽人語倏然臥空庵清猿夜深雨

幽居

索居簡人事與世意罕投柴荆已就理歲功念西疇落
落雞犬墟隱隱漁樵洲嘯傲一壺綠聊復寫我憂及辰
寓沖賞獨策還經丘向夕山景霽延矚明川流白雲息

空谷歸鳥鳴林幽人生亦委化汲汲將焉求

南山丈人

丈人山南來鐵面冷松露野芳隨春妍香入青芒屨
逍遙憩幽磴晚我如有素即之亦無言還帶山雲去

玄上人

安禪簡清素趣與外迹絕玄談落松風洒我一襟雪
逍遙花雨外豈復念濁熱夜久白河沈擣簷耿踈月

訪友

閒攜綠玉枝遠詣詩老家斷澗秋木落寒沙炯泉花高
談意偶合脫落偈仄歌從容飯雕胡屢淪粟粒茶亦復
事文翰醉字縈秋蛇慷慨振吟袂歸途及棲鷗

秋原

晴烟淡秋原枯梢翳殘葉蘭芷徒自妍芳馨誰採掇豈
無同心人歲月念飄忽詠思河水深迢迢暮雲合

接竹引泉

蒼潤隱石脈幽源迸山椒連筒入雲竇勢接河漢遙引

茲一線秋高下穿林梢聯絡裊相拄旋折不辭勞挽之
歸我廬晴雨注屋茅乍室或細細久續俄嘈嘈空堦落
琴筑虛瓮鳴鈞韶盪浥足自潔心迹良已超固無鼎釜
珍頗煮溪澗毛未能學許由厭喧解風歌

謝僧茗餅

僧達無生機寂念若冰冷汲來石根泉淪以雲腴餅舌
端味枯禪了然發深省歸策石林空清颺下松頂

白水晁居士名家駒也脫俗嗜飲所居有斷崖夕

翠軒留偈而化賦此寄悼

晁子摩尼珠照徹白水源不啜趙州茶不面達磨禪山
餅潑乳酒瀟灑夕翠軒飄然忽謝去遺偈如濤翻逝鴻
無留影落葉返故根寂照本非滅今滅昔豈存蒼蒼斷
崖陰寒移自清妍

答褚思古

褚公何為者處鈍以藏兌哦詩古松根古人思遠詣疎
懶意自真客至忘冠帶流俗豈同調目擊趣自會素琴

固不澤抱樸乃不敗悠然流水意本在徽絃外溪暖潛
鱗躍野夕歸鳥逝與子盡樽中漁舟具清瀨

次韻張洞雲

張子湖海襟乃復喜巖穴朝食進芝髓夜誦然松節深
雲暗幽洞仲夏欲飛雪下春炫餘景林水互明滅歎客
垂磬室頗感十年別攜琴意已消酌茗石蘿月

褚澗月

道人澹無為懶散忘盥櫛掃石秋樹根曙澗濯殘月袖

浥水光潤履帶水翠滑虛闌倚雲歌清猿共孤絕

湘中

天寒楚雲淨木落湘山幽空江夜來雨水滿蘆花洲西
風何渺渺滄波日悠悠有懷誰與言注目孤鴻秋

西山

西山一何佳稅駕謝囂塵獨往殊有趣野鹿如親人冷
泠澗下水練練山際雲幽憩任疎散岸幘青楓林

夏日偕友晚步飲聽泉軒

終日局環堵散策窮深幽嘉我二三子落落成罕儔適
意隨所詣行行遂經丘青松如高人含風自蕭颯夕雲
度深翠爽氣衣上浮石根瀉幽泉戛戛鏘琳球樂彼泉
上趣幽構飛岑樓新蘭秀而滋舊竹清且脩歎我情頗
厚清樽頻獻酬盤桓有餘樂嘯傲成遲留池深風露香
荷意澹欲秋飲散衆喧息微月生林陬

用前韻

夏郊景氣清况我沖抱幽深居節已換眷眷懷良儔人

生磊砢胃要貯壑與丘振衣一長嘯涼吹來颼颼貫石
有飛泉隱見晴雲浮初疑奏琴筑忽若鳴琅球寒光蕩
林翠爽氣涵山樓相期濯塵纓慰此情好脩引歎酌深
綠素賞歡已酬了忘區中緣便欲為此留松深日云夕
練紈早知秋彼美天際雲歸來宿岩陬

松下泉

長松蔭層巒黛色入崖骨鬱為翠雪浮蒸滃香不歇融
液作寒泉飛迸出石窟不濯軟紅塵空山瀉明月

九日偕友登東岩定香寺

茲巖何穹窿迴出塵壤隘當時補天餘偶墮靈鼇背神
丁挾竒功塞北滄溟滙翠濤化十峯尚作掀舞態色連
空宇高氣薄坤輿大紺廬切層雲粲然金銀界猶封開
闢土迂曠無斬難至今絕頂泉下迸萬丈內陰陽互轉
轉造化自根蒂崖壁鑿靈境洞壑索寒瀨旁開一罅峽
天影落清黛陰嵐灑晴雪夏練結幽晦石門聳峩峩屹
若劍門勢在昔乾符間綠林肆兇厲托茲保遺黎殘石

猶紀載憑高達遐觀訪古起餘慨盪胸瀉河漢散髮沐
沈瀝煩襟忽如遺舉步寄一快攜朋作重九秋高崖菊
細濁醪艷華觴浩唱發雄邁仄身下天磴百盤經險怪
目眩神蕭森冷風蕩歸袂人生諒逍遙歲月豈余貸吁
嗟謝公屐云此遺勝概回首山蒼蒼夕鐘渺雲際

山中雲

空山有白雲雅與高人約卷舒本何心乃似悅遐矚色
幽淡山翠意遠度溪綠日暮久徘徊前村雨應落

次韻幽居

晨興啟衡門見此溪南山山光入溪綠水底明青鬢熙熙自漁樵清歌時往還莞爾發永晤寘我丹青間

西山書館植菊為隣豕所踐

耽書息世慮種菊祛俗塵閒攜手中書往訪西家隣雨露分寸苗書暇策我勤無何彼艾穢縱逸戕其真懷哉楚屈平憔悴窮夕曛榮枯固有數悵然念芳芬信知洛中花乃壞逸驥羣寧如擁腫樗不夭匠石斤挾策嗟自

誤亡羊監前因所貴本根在生意喜復信歲晚同襟期
而我及數君採芝豈辭漢種桃非逃秦摘英泛濁醪孰
非東籬人

清溪深

連娟數里洲翠篠何森森微風動枯撐謾鳴空林雨
散幽猿啼野樹烟沈沈薄暮有遙棹歎乃清溪深

相逢吟

客從郢中來抗志青雲表持螯共拍浮江遠孤舟小寒

夜潮氣白楚樹晴烏早酒闌起推蓬落月在西島

讀張巡傳

我懷張睢陽厲節剛不吐妖氛暗寓縣奮迅提虎旅憑
城怒裂背忠勇激肺腑探甲四百戰竒計不可數江淮
卒保障藉此奠唐土可憐將孤軍機勢已莫禦食盡兵
亦窮愛妾入鼎釜雷南空桓桓餘勇不可賈身城遂俱
亡大義著君父人孰不能守公守以死拒人孰不有死
公死乃其所繁霜表貞松迅水知砥柱當時偷生輩渙

忍猶妾婦青燈撫遺編英氣凜千古

明妃曲

逝水無回波去箭無返筈十載昭陽春萬里龍荒月風
沙滿宮衣慘淡餘香歇哀弦濕絲淚淚盡弦亦絕寄語
漢飛將此計誠太拙蛾眉豈長好不久為枯骨

高郵府神遊臺

淮南古竒勝瀾茫雲水麗郵城枕其中喧喧擁闌闌壯
覽城之臯飛臺翼翼雲際灩灩白銀盆沈沈水晶界玩心

神明表引興天地外把酒一憑闌天風落襟袂懷哉淮
海翁落日為三酌

此山詩集卷二

欽定四庫全書

此山詩集卷三

元 周權 撰

七言古詩

呈伯長袁學士

玉堂中有真仙人
錦衣剪製五彩雲
瀛州高處睨八極
奎躔光氣胸中文
揮毫對客驚風雨
詞翰風流邁前古
榻前草制回天顏
夜歸長照金蓮炬
龍門賓客何繽紛

一經品藻生陽春斯文之寄蓋有在孰不奮勵激陶鈞
蹇余鄙陋真無似家在江南萬山底石盆鑽木不能穿
半世吟哦事芝髓可憐歲月空駸駸高山流水無知音
黃河泰嶽何高深見公不負平生心

徐仲晦作書惠水墨梅圖有和靖題紀歲月絹素
蠹敗餘字不存作書歸之

溪藤搗霜寒奪目硬黃瘦字疎相續墨花出袖吐春妍
一片玲瓏水蒼玉分明寄我孤山圖上有歲月書林逋

古冊漫漫篆窠暗敗素颯颯形神枯西冷橋畔黃昏景
船頭鶴夢風吹醒一從馬鬣鎖荒寒萬古人間幾香影
苦吟老盡詩壇豪窮愁到我心徒勞還君此畫三太息
雪晴月映橫牕梢

羸驥行

高秋吹霜沙草衰駟駟牧野無龍媒伶俜羸驥空伏櫪
長稽短豆隨鴛駘筋聳睢高眼如井月冷沙空徒顧影
颯辣長嘶萬里心雄姿困頓無由騁乃知天閑十二屯

如雲龍鷹豹股八尺身蹴翻青雲振綠髮金羈照耀皇
都春朝辭天山暮碣石飛電流雲邁無迹風姿欲軋拳
毛騶意氣能傾照夜白短衣奚官霜蚪鬚圍養芻粟多
遺餘絕憐羸驥不滿腹翦刷猶可同馳驅我欲進之嗟
遠道神全形枯難自好按圖舉世識驪黃懷哉駿骨秋
風老

惠山寺九龍峯下酌泉

惠山鬱律九龍峯磅礴大地包鴻濛劃然一夕震風雨

欲啟靈境昭神功六丁行空怒鞭斥電火搖光飛霹靂
一聲槌破老雲根嵌洞中開迸寒液道人甃玉深護藏
鏡涵萬古凝秋光陸翁甄品親試嘗翠浪煮出松風香
我來山下討幽境自挈瓶罍汲清泠味如甘雪凍齒牙
紺碧光中敲鳳餅昏塵滌盡清淨觀心源點透詩中禪
亟呼陶泓挾玄玉揮洒字字泉聲寒投閒半日聊此駐
孤棹明朝又東去紅塵人世幾浮雲鐘鼓空山自朝暮

次韻徐景端席上

洞庭霜橘包黃銀海邊丹荔輸閩珍高堂開筵薦華俎
風味雋美懷芳新蒸花壓玉釘鷺炙雕盆犀筋行鮮鱗
紛紛歌管奏名妓秩秩簪履羅佳賓芳樽細酌綠琬琰
寶罽共擁紅麒麟燒殘絳燭轉留客疑有四角生車輪
書生商歌風雨室此志鬱鬱何由伸短衣穿肘不掩脛
五窮相與為雷陳青陽開動生意達短翅亦擬凌空雲
豫章遠志各有適黃鐘瓦缶俱陶鈞且安麕羈樂澗濱
未厭紫豉羹吳蓴

贈雷紫崖高士曾築室於華山

紫崖高人頭欲雪神清貌古髯過膝
秃蛟入硯生雲烟叱咤風雷鬼神泣
清霄幽夢回瑤壇鼎中龍虎催九還
飄然晞髮太華頂醉睨海浪天風寒
竭來訪我蒼溪澗白石清泉不堪煮
共譚世事兩茫然竹屋青燈夜深雨
牧羝行

朔風吹沙浩漫漫冷光射目愁雲昏
茫茫大漠亘萬古何處有路通中原
羝牧老草枯死倚節自誓無生還

餐氈噬雪氣自倍
婉孌兒女懷飢寒
夜長空望漢月白
幾度弔影憐羈單
已將傲兀壓憂患
獨仗大義排堅頑
此生自信歎不乳
豈意雁足傳間關
歸來屬國豈不厚
區區一飯皆君恩

鴻門宴

項王高宴鴻門北
風雲奔走天為黑
椎牛刺豹酒三行
談笑戈矛生頃刻
豈知天命非人謀
玉玦三提事何益
興亡楚漢兩干將
開闢乾坤雙白壁
喑嗚漫說萬人敵

龍準天人竟誰識玉斗聲中霸業空烏江江水還流東

紀信歎

沛中龍奮芒碭雲咸陽楚炬三月焚兩雄角起鹿在野
三戶有楚無強秦貔貅百萬紛如雪戈矛盡染英雄血
旗旄曉蔽天河雲兵塵夜暗中原月滎陽數載戰不休
重圍食盡漢亦憂將軍詐帝出降楚脫帝虎口真良籌
無何諸將已平楚事定論功裂茅土獨無旌美到將軍
不得褒名紀盟府男兒死節志已酬瞑目地下夫何求

吁嗟功怨俱悠悠漢廷雍齒還封侯

赤壁泛舟

赤壁之山何峻嶒下有江水何清冷
天空月出夜寥泚玻璃萬頃涵秋冰
為問黃州雪堂老遷官何如謫官好
酒酣攜客夜擎舟憂患都將談笑了
劃然長嘯來天風神遊八極世慮空
但見橫江秋露白錯落低垂斗柄紅
舉袂欲挹浮丘公洞簫聲斷潛蛟舞
月下清樽貯千古老喘當日困周郎
十萬樓船鬪貔虎烟銷水冷沈戈矛

空餘野燐寒沙頭江中牢落滿陳迹追憶往事懷風流
勝遊到我知幾度感昔視今猶旦暮乾坤何事老英雄
袞袞長江自東去

贈筆工王子玉兼能書

蘭陵有客鬢如戟吳霜滿鬢秋蕭瑟廣寒偷拔老兔毫
歸寓管城湯沐邑興來忽駕錢唐舟惠然訪我蒼山陬
酒酣作字大如斗玄雲落紙香浮浮我慙識字先白首
故硯磨穿筆如帚與君邂逅兩忘年暮雨江湖一樽酒

贈畫牛褚冰壑

魁形碩骨高峻增弭角垂耳行凌兢蹇余已向田間老
一見此圖知畫好春郊雨後烟草肥吳犍十角相追隨
前行過浦一回顧後行駭駭不敢渡牧兒笑怒急掉鞭
繭粟劣黠衝爭先蓑衣不脫春烟煖一笛斜陽牛背穩
雖然此筆全於天安能為我畊硯田我今身似扶犁者
此景此牛何必寫好從天廐圖驂馱氣厲八極凌高秋

子陵釣圖

東都熱官手可炙吳儂面似秋江色平生落拓一羊裘
七葉貂蟬不堪易功臣盡在雲臺中丹青化作灰塵空
先生遺貌乃在此釣竿尚裊桐江風悠悠世事江雲白
過眼輕帆自朝夕人間萬古仰孤風天上有星猶是客
清溪張歸雲不嗜酒肉工詩安貧所作少年行因

次其韻

五陵年少風流客花間開宴春壺碧豹胎熊掌羅玳筵
犀筋逡巡萬錢值綺羅吹香圍肉屏棖棖銀甲喧瑤箏

高燒紅蠟作長夜白日過眼如流星可憐氣岸如山阜
雨散雲飄不能久繁華富貴惣如夢昨日朱顏今白首
爭如芝田野老衣懸鶉饑擷芝朮餐芳年新詩日富不
厭貧謂有堯舜為吾君少無逸樂老無戚尺澤自可潛
幽鱗誰知清溪有鶴不可馴白雲浩蕩青林春

次韻張剛父觀物軒

觀物之變觀化原游物之初游於天萬象起滅隨飛烟
守之惟一天乃全秋風葉落春花妍盛衰老壯人皆然

潛機剝復相回旋至理妙契言難傳張君目擊道所存
身具太極誰參玄返君觀物觀諸心我心外物安能遷
鶴長鳧短隨所便莫問漆園齊物篇

次韻褚仲明苦熱行

燭龍銜火飛南陸萬疊雲峯天地窄鯨波沸海泣陽侯
涸盡泉源爍金石人間何處逃隆暑細葛如裘汗如雨
蒼生墮此深甑中救暘何時命如縷我欲太華峯頭酌
瓊液醉臥青瑤嘯松月明星邀我玉井旁共折芙蓉弄

香雪扶搖直上九萬里高揖盧敖太空裏手攀斗柄睨
塵寰濯足銀河弄秋水

錦雞

巴山靈鳥初離羣葳蕤麗組雲錦文羽翎新刷爪距利
采色勝似沙頭鴛鴦嫩入戶爛相射嗉中有物垂紅碧
綬光若若花盤條出示山童有矜色文章固足媒爾身
雕籠拘繫還悲辛區區啄飲豈不厚情深野樹溪雲春

焦山寺

赤霞夜出扶桑東海雲捲浪凌虛空剛風浩浩吹不去
崔魏化作青蓮宮萬衲月寒清梵寂四面沈沈皆海色
鐘聲不許到人間自送潮音落寒碧

八詠樓

金華盡是神仙府羣玉峯高青可數絳氣光騰寶婺躔
婺女從來司此土我我飛觀矗雲巔幡幢香靄羅真侶
窮高更上沈郎樓萬象憑欄一揮塵雙溪上溯銀河流
捲地寒波翠蛟舞詩人去後景物閒山月溪風自賓主

當時八詠畫圖間翠琰娟娟犀鳳翥高秋落木天地寬
獨酌清樽慨千古浮雲世事兩悠悠突兀空樓老風雨

次韻岳宰

舊交落落十八九萬事從渠屈伸肘東華塵土少年憂
歲月無情一回首岳君氣爽太華秋不隨王粲悲登樓
熙朝已具清廟器吾道豈復歸山丘文章誰道同芻狗
還有問奇人載酒清談灑灑秋莖露飽食官羊寧有數
舊家桃李春漫漫流芳枝葉纔堪看江梅自分託歲寒

一枝遠寄懷清歡

次韻邵本初

詞源倒峽驚濤吼不羨當年燕許手快意閒觀未見書
約客滿浮無事酒驪珠光迸錦囊裂一生不掉儀秦舌
有時一舸訪逋梅梨雲夢覺西湖月有時歌騷湘雨霽
采得秋蘭紉為佩歸來溪上賦閒居不着閒愁生感慨
丈夫出處何可測量材定有古玉尺近聞黑廬上霜臺
暫作紅蓮幕中客

次韻友人

憶曾共醉高陽池，銀毫翻墨擣烏絲。
江鴻海燕忽相背，幾度夜雪山陰時。
東華塵土黑貂敝，南樓月好思元規。
十年始赴鷄黍約，春雨剪韭供新炊。
青燈對坐落寒燼，夜談疊疊真忘疲。
天根妙意祕莫寫，心薄萬古含清輝。
通家交好固不遠，從容硯席還追隨。
劃來健句脫秋隼，清似菡萏開秋陂。
翩翩瘦字老蛟舞，八妙信劃沙中錐。
手絃綠綺不可和，楚天日盡孤雲歸。

舟行阻潮

江流浩浩吞長天打篷巨浪翻
銀山篙師維舟不敢發
東望微茫盡溟渤荒村古渡生客愁
丹楓落葉秋颼颼
夜半西風卷江雨
咿軋數聲聞過櫓
風收雨霽晨氣清
金烏蕩漾波間明
舟人歡呼指歸路
十幅蒲帆順風去
和萬象菴枯木竹韻

物生宇內有萬殊本之一氣隨盈虛
木兮竹兮豈同類
吾自喪吾渠忘渠神全形枯真散木
束翠稜稜一叢竹

豈其無用全天年猶有琅玕在其腹蒼苔蝕盡風雨根
豈願斲削為犧尊歲寒相與數君子滿目桃李爭新春

寒碧軒

鍾山窈深仙所宅道人棲真外形迹一粟中間世界藏
心自寬閒軒自窄默然宴坐守玄牝清夢都無室生白
古胷元自貯冰雪幽興時能寄雲石爛柯仙去石枰空
野鶴翩躚松露滴人間酷暑到無處一一琅玕照瑤席
快意蕭蕭風雨寂寒倚晴空數峯碧

採蓮曲

越溪女郎十五六翠綰香雲雙鳳感嫣然一笑似花妍
艷試新粧照湖綠羅衣露浥紅芳秋少年陌上情綢繆
蘭橈容與隔花語驚散鴛鴦生晚愁蓮花莫折莖有刺
藕絲易斷針難度清歌一曲入湖烟空載香風滿船去

西瓜

當年傳種非東陵蒲萄石榴來與并碧壺深貯白沆瀣
霜刃凍割黃水晶豪家宴客侯鯖列濁酒鯨吞嫌內熱

此時專席薦冰盆分與風前滿襟雪

此山詩集卷三

欽定四庫全書

此山詩集卷四

元 周權 撰

七言古詩

次韻謝益洲賀生孫

清標壺冰炯人目惠然共剪西牕燭酒酣慷慨意氣傾
且羨堦庭有蘭玉阿翁堂上白髮新自意培塿無鳳麟
娛情聊爾慰欵欵流慶未必誇詵詵君家珠樹春風裏

聯芳競賞無凡子寧家宅相魏家兒換葉移根願同此
春夜諸弟邀飲因觀海棠

東風花谷紛紅紫九陌輪蹄隘香霧風流炫耀花中仙
萬斛臙脂滴紅露天然富貴出幽姿一顧傾城誰敢妬
搖搖風雪未輕飄縹緲絲雲飛不去傳觴花底溜紅光
銀燭燒張最高處團圓燕樂怡天倫共憶兒嬉有真趣
安得花前再少年搥鼓插花窮勝事百年光景難把玩
天馬途深感遲暮人生流坎委大化縱爾浩歌吾起舞

高堂飲散夜沈沈
社雨閣寒春欲曙

歐陽公雖不到杭而惠勤師思之因所居有湧泉

出因名之曰六一泉

歐公天人世無匹
六物之中目為一
孤山山下西湖西
飛夢逍遙繞雲石
鑿開瑤窟迸銀泉
水鏡胷中湛虛白
是心洞洞何所容
內照此泉皆外物
坡翁好事鐫蒼珉
醉墨雄翻扛鼎筆
至今草木餘清輝
冠劍一時隨戲劇
兩翁神與造化遊
鞭駕風霆揮八極
垂光後世幾千年

名不可磨泉不竭

夜泊吳江

瀾茫巨浸無坤軸溶溶一鏡天東北兩虹渴飲駕空來
千尋橫截玻璃碧嚙堤駭浪飛晴雨晦冥白晝蛟鼉舞
萬家燈火水晶宮令肅貌貅夜撾鼓斗柄銜城湖月白
清愁惱我江南客安得風流張志和共醉漁舟擘長笛
王張二提舉攜酒驛亭餞別因次同舟李彥謙韻
立馬沙頭一壺酒故人餞客官河道水蒲芽白沙柳青

東風點拂春多少春波浩蕩快揚舲滿目好山青不了
人生漫浪如浮萍世味苦辛如食蓼天游笑我外形骸
俗眼從渠分醜好秋毫太山兩不足箕斗虛名我何有
人間汨汨聲利場昨日少年今白首繁華萬事風雨歇
曲樹深池幾芳草淒涼舊燕語烏衣飄零老鶴歸華表
憶曾高樓夜呼酒剪燭聽歌聲縹緲酒酣耳熱捐寶釵
客主相歡意傾倒只今憔悴酒徒散桃花已笑劉郎老
胸中耿耿尚如昨濯足新豐歌浩浩攬衣中夜起徘徊

撫劍燈前感沖抱參橫天外落霜鴻一聲畫角秦淮曉
雪軒高士以白紵製服作詩戲贈

經冰緯玉紛縱橫三盥寒露方織成曉機裂下不敢玩
一道雪瀑來中庭天然精潔不可沉屏熏麝染慚吳綾
製成素服輕於雪雅稱仙官鏘珮玦星斗離離夜挿椽
高興飄飄白雲闕乘風便鞚紫鸞車瓊簫吹落蓬萊月
夢訪蒼山道士醉臥不起坐聽鐵冠散人鼓琴覺

後屬成

道人醉臥呼不起春風吹花滿烏几鐵冠散人石作腸
一曲泠泠寫流水曲終意遠流水長幽襟炯炯含秋霜
一聲野鶴不知處雲霓明滅山蒼蒼

金山龍游寺

金山突兀摩青冥六鼇駕海來蓬瀛風濤卷雪撼不動
中流湧出毗耶城山僧眼底乾坤濶俯瞰朝暾乘落月
鐘聲薄暮來蜃樓燈影晴霄入蛟窟馬銜韜怪蒼龍蹲
聽法臥護孤雲根參旗歷落倚闌楯金碧照耀滄海門

天光萬頃涵虛碧扁舟獨艤玻璃國六朝興廢幾英雄
往事雲浮江露白窮高一覽雙眼明天風灑我毛骨清
淮山數點不可寫矯首九萬搏風鵬

覽社湖

碧天如幕沈雲影飛廉不怒銀濤靜驪龍正睡貝宮寒
一鏡光凝青黛冷數聲漁笛來何處白鳥雙雙忽飛度
夜深明月生孤蓬人在廣寒臥風露

八里莊渡淮入黃河水渾不可飲過徐入清河水

方澄潔信筆閒記

河流汨汨如涇水濁浪崩騰疾馳駛一石中膠數斗泥
舟客居民皆飲此黃河不復行故道下注清淮通海涇
十人度索上一洪寸寸強弓挽難起屹然跌坐如僧禪
日與篙師同愠喜青山一髮認邳州蕭條暮上魚豚市
酒邊一笑我何為獨冒驚濤行萬里爭如林下混漁樵
俯仰嘯歌行復止回頭寄語北山雲征塵待向風泉洗

徐州暮泊風雨驟至

清河綠漲琉璃堆黃河濁浪排空來兩流合一混涇渭
噴薄東注無時回孤城迤邐枕其左晝夜怒激聲喧阗
人烟蟻集一闕市夕陽孤塔空崔巍客舟簇簇鬧河滸
極目但見烟中桅黃墟呼酒足自慰愁城頓破紅顏開
須臾笑電急驅雨神物變幻令人猜狂飈揚沙昏白晝
黑雲捲地翻風雷

雞鳴臺

橫空陣氣長雲黑戈鋌照耀旌旗色龍跳虎躍神鬼愁

楚漢存亡一絲隔相持兩地皆雄據楚力疑非漢能拒
瑞啟炎圖芒碭雲悲歌霸業烏江路空遺故壘傳遺跡
離合山河幾勁敵戰塵吹盡水東流落日沙場春草碧

魯橋

泗河汨汨流青銅魯橋突兀橫長虹驚波蕩涵石鬪怒
石門空洞如弛弓風霜剝蝕勢欲壓亂石齒齒填深洪
南連淮楚九地厚東導齊魯羣流通征商懋遷百貨阜
來帆去棹紛奔衝車輪彭鉤鐸聲急馬蹄蹴躍塵影紅

我遊天京偶經此一見淳俗真堯封扁舟膠洄守連日
欲去未去心忡忡嗟余行役浪自苦颯颯吟鬢將秋蓬
摩挲殘碣討遺迹搔首躑躅斜陽中銜杯一洗胸芥蒂
浩歌目送吳天鴻

謫仙樓

山東濟州

大羅仙人李太白秋水踈蓮浮玉色一來金馬玉堂中
詩酒猖狂天子客飄飄豪氣秋風起登樓曾醉山東市
放浪形骸宮錦袍榮華富貴東流水酒酣揮灑翻河筆

險語能令神鬼泣至今光焰照塵寰一字堪償雙白壁
我來懷古空悽愴風月千年尚無恙何時相見崑崙丘
汗漫從遊九天上

濟南原上

朔河春透冰未裂黃蘆伐盡洲渚濶荒祠老棟壓欲頽
古樹無枝根復活長嘶飛騎抹流雲草舍微茫聚疎樾
夕陽返景低黃埃漠漠平沙浩如雪

原上

風捲長河雨聲歇掠面驚沙草如雪亂山青盡天茫茫
萬里孤雲沒飛鷗啼烏城上行人稀白楊蕭蕭塚纍纍
目斷清明原上路日暮紙錢撩亂飛

冠州

臨津衝要環墟市橫橋斷岸人如蟻車聲軋軋風蓬蓬
道上黃塵半空起御河柳色如藍綠翻翻酒旆風高轟
歸馬聲喧烟火深落日孤城催暮角

呈趙子昂學士

號松雪

蓬萊仙人似松雪曾向天潢遡銀闕天孫為製紫綺裘
五色雲邊佩明月近聞承詔白玉堂詞頭夜夜風雨忙
一揮九制夜未艾金蓮分賜宮壺香淋漓妙墨蛟螭走
世有鍾王皆斂手偶然醉帖落人間隻字珍藏抵瓊玖
我家浙水蒼山東閉門偃臥甘詩窮辦香未展師道故
攜琴暫出杉蘿中間公何日作霖雨只把文章事明主
願恢斯道澤斯民奕奕光華照千古

趙子華乃跡弛之士齒新氣銳痛飲豪吟座中未

有出其右者

趙君曾吐虹五色飲酒哦詩世無敵夜寒濯髮當銀潢
酒星飛入錦繡腸眼花耳熱忘爾汝筆陣如雲來黠武
百番玉版連秋霜空中錯落天葩香千竒百怪驅風雨
露洩玄機鬼神語須臾收斂寂無譁依然醉盃翻流霞

元正觀朝賀

斗杓半夜回天東人間鳳歷開華風
聯鑣飛蓋擁千騎
家家銀燭搖春紅金門玉漏聲初歇
已聞曉鑰開閤闔

聖人端拱九天上殿前曉仗催班列瞳瞳瑞日紅雲開
太液春生萬壽杯龍旗微動曙烟煖山呼虎拜聲如雷
乾坤千載開元會太和氣象唐虞世千官宴罷帶花回
十二天街喧鼓吹

龐眉黃冠方外奇士也攜山水圖求售知余不納
必欲求詩

鐵冠鶴骨玄都仙清晨過我談重玄手中衡霍隨塵几
縞素颯颯開風烟正嫌客舍如舟窄掛壁恐渠衝破屋

急教童子捲還師始覺眼前無突兀

呈虞伯生修撰

自號青城山樵蓋蜀人也

青城仙人清且都眸炯巖電胸冰壺錦裳照耀青霞裾
水玉作佩聯明珠馭風來直承明廬贊述大道光唐虞
朝陽孤鳳鳴高梧冀北騏驎空羣駕蹇余濩落山澤臞
抱甕汲澗澆畦蔬遠遊非涉聲利途願謁國士開榛蕪
顧公磊落世所無文章價重真璫璫木天咫尺何時居
家聲自是行祕書

客枕

寒更四點雞未號
行人道上聲嘈嘈
酸風慘慄寒蟲
長河爭渡冰堅牢
霜花著面膚欲裂
虬髯稜稜凍欲折
征車捲地聲如雷
駱駝吼落燕山月

蒲萄酒

翠蚪天矯飛不去
領下明珠脫寒露
纍纍千斛晝夜春
列甕滿浸秋泉紅
數宵醞月光轉穠
腴芳髓蒸霞煖
酒成快瀉宮壺香
春風吹凍玻璃光
甘逾瑞露濃欺乳

麴生風味難通譜縱教典却鷓鴣裘不將一斗博涼州
子昂學士為余作此山二字并作詩見畀其詩云
青青雲外山炯炯松下石顧此山中人風神照
松色又云爽氣在襟袖清風拂絲桐悠悠適天
趣宴坐心融融書此以謝

一丘合老漁樵席詩聲誤落燕臺側
黃緣得見玉堂人
面帶九霄風露色夜光爛爛明月章
惠然墮我雲山旁
臨風諷咏松色句草木往往回春光
松根老屋此山字

娟娟寶墨浮寒翠
行人屋外屢徘徊
日落山空有虹氣
晨牕夢覺秋意清
三盞菊露呼陶泓
開襟感激浩難寫
萬古不盡山青青

此山詩集卷四

欽定四庫全書

此山詩集卷五

元 周權 撰

七言古詩

古琴漆有蛇蚺紋者材之良也道友攜一琴甚古
謂是零陵湘石枯桐斲成索價三百緡無償之
者戲作湘桐吟

黃鍾沈聲喧瓦缶良材入爨知多少誰裁鳴鳳千年枝

蛇蚺龍紋巧蟠紐澤堅古漆光不磨徽絃不具含雲和
已無伯牙之手子期耳三歎如此湘桐何

夏日訪黃府尹席上次黃德厚韻

畏途漫漫正煩熱故人一見忙解榻竹根凍綆汲寒泉
一室空明意清豁夜涼華月流素光忻然狎客飛瓊觴
千篇已羨奴島可五詠未許餘山玉綺筵秩秩羅珍具
蔗漿盃冷芙蓉露浩歌夜久興徘徊殘蟾西沒斜河曙

軍中樂

甲光半夜開金鱗旄頭射落天邊雲
征鼙聲冷沙塞月朔風馬上驅妖氛
歸來天幕宴平楚貔貅列甕燔豹麇
虎皮裹戈馬在收將軍好武亦好文
詩成頃刻手自寫草書敏妙疑通神
文鋒快劍斫長陣筆力巨弩回千鈞
酒酣作樂兩耳熱對客談笑如春溫
笑余早亦學書劍一鏡白髮俄紛紛
袖中空有清河頌願借綵筆揮寫呈
吾君

馮潛夫歸蜀有作歌以相其行者因借韻為餞

霜橫空兮氣凝肅風驚沙兮聲簌簌送遊子兮西還膏
吾車兮渡瀘曲子之家兮岷峩西行萬里兮居將卜蜀
道難兮猿攀緣峽水怒兮龍噴薄顧萬鍾兮焉求安一
瓢兮自樂田寬閒兮澗阿山窈深兮盤谷釣清溪兮友
吾鷗歌白石兮飯吾犢食無魚兮不如歸返屠羊兮分
自足嗟歲年兮遲暮念衆芳兮搖落嗟聚散兮須臾將
氣誼兮永託歌擊節兮盡歡屬離觴兮更酌渺余懷兮
何言遡孤雲兮寥廓

長城

長城峩峩起洮水盤踞蜿蜒九千里朔雲浩浩天茫茫
悲笳落日腥風起猶傳鬼神風雨夕知是當時苦苛役
征人白骨掩寒沙化作年年春草碧祖龍為謀真過計
自成限域非天意力窮城杵怨聲沈禍起蕭牆險難恃
豈知一朝貔虎來關東咸陽宮殿三月紅

吳僧能詩自號心聽必欲求證為著轉語莊子至
人之息以踵眾人之息以喉

吾間至人踵息不以喉師今心聽欲廢耳師能借聽役以心心我都忘聽何起說空已是自纏縛只此了然皆具足不如無聽亦無心渴則飲茶饑食粥

余昔年邂逅登山東廬長卿之門遂聯轡遊京師真所謂傾蓋如故者也別六年重過其廬則已為他人屠沽肆矣因詰隣翁乃知以窮徙他所遂往訪之繾綣話舊成短歌以勉之

君才英妙如終童豪氣傲兀山之東觀光曾共遊京國

重來風雨非舊宅休言煮字不療饑
煮愁那得愁熟時
王家紙尾一十萬羅胸撐腸五千卷
讀書寫字雖兩途
時來喝采皆臬盧丈夫窮達固難必
誰肯低頭老蓬華
不妨起舞夜聞雞趙堯何止居刀筆

次韻白石菴

空山白石何嶙峋石根有水流蒼雲
巖花泣露照初日
野鳥交戛青林春飛樓隱隱出林杪
閉門芝朮生奇芬
道人宴坐百念寂
睨視外物皆浮塵
吾觀萬法了一電

何暇究意追途津欣然會如有得起試鳳餅糞枯薪
拍闌一笑碧霞外清風為我吹囂氛聽師清談洗淨業
睽我皓首窮玄文忽驚秀句寫山色紫翠滿几爭披紛
松聲萬壑不可和試攜綠綺當晴曛

呈袁伯長學士

直廬高寒挿穹窿日高槐翠深重重僂人傲兀瀛與蓬
紫霞飛佩裳芙蓉澄澄秋水炯兩瞳崢嶸氣挾太華峰
冰懸雪跨磊砢胸直攀斗柄斟天漿手提文印六一翁

姓氏藉藉傳兒童
銀河倒瀉淬筆鋒
清文五緯麗太空
講論六籍恢深洪
皇猷黼黻天開容
老余賓客曾登龍
反觀禮樂拜下風
賦歸偃卧蒼山中
十年雲樹吟江東
重尋故武來觀光
辨香御袖懷冲冲
苦吟依舊號秋虫
黑貂敝盡心徒雄
遺音誰取爨下桐
散樗濩落甘長終
公司文苑聲赫隆
芒端寒燠參化工
庇寒更願蘇瘰悃
勿負四海斯文宗

寄趙秋水提點

清齋

神仙謫世自奇絕，誤讀黃庭俱浪說。
銀潢秋水淡精神，絳雪玄霜老風骨。
寰區腥腐那敢供，若木可攀芝可掇。
有時宴坐意逍遙，萬象達觀無起滅。
我慚短褐老京塵，憶曾攜手都門別。
玉書煜煜青霞囊，直上仙都鏘珮玦。
天風吹老碧蓮秋，高嘯鼎湖峯頂月。
白雲來去本無心，老鶴孤鶩瀛海濶。
竭來十載喜相逢，笑我紅塵早華髮。
蒼精含景紫芒寒，落塵玄談灑松雪。
蓬萊茗盃和香啜，芙蓉露冷秋雲滑。

次韻馮仲遠聽隣舟孟監州琵琶

江州司馬真愁絕，潯陽夜醉黃壚月。
琵琶撥動兒女情，淚濕青衫寫淒切。
漢東傑客老監州，雲夢胸中吐竒崛。
春風斗酒忽邂逅，暮雨扁舟談激烈。
酒酣古調手自傳，鷓鴣絃撼動龍香撥。
抑揚按節氣雄放，清度回飈激林樾。
迢迢訴盡出關情，漢宮往事孤鴻滅。
黃雲萬里絕音塵，馬上誰能記嗚咽。
新聲洗盡鬱輪袍，清和扣舷歌間發。
曲終一笑兩茫然，江水冷冷滿襟雪。

次韻濟翁叔併謝諸公

一尊俯仰乾坤濶何處蓬萊白銀闕百川東去無回波
白日人間事如織安能久挽林下鞅要挹終南嵩華碧
壯遊直上黃金臺赫弈光華彌上國三年客夢天之北
梅花萬里關山月對酒亦有新豐歌題名未問遊巖宅
吟裾不曳王公門禁林曾謁文章伯滿襟逸興征鴻高
過眼浮榮流電疾雲山戀戀未忘情歲月悠悠易成昔
酸風已破黑貂裘晴灣又割沙鷗席陪翁夜話不忍眠

銀燭花殘仍見跋諸公忽昇金薤章十襲九緹良足惜
老韓險語軋霄崢大陸雄文妙英發剡溪玉板灑烏丸
句中風露含秋色方今妙選需賢才遺韻重宣機籟寂
青雲當賦杏園詩白首毋尋草玄筆

甃社湖凍合舟膠不行借陳彥謙韻

天風吹濤攪瓊汁崩騰一夜堅如石白銀色界曙光寒
粼粼失却玻璃碧篙師競擊聲礮破千槳撼動鮫人室
孤蓬正似蓮葉舟安得乘風從太乙

呈閒閒宗師吳公

上界仙官紫宸客
朱顏雪額雙瞳碧
超然心與造化遊
回頭風雨人間窄
金函玉印來帝傍
贊書屢下紫沉香
珠裳寶璐映星月
蒼精含景生寒芒
年光老我紅塵裏
遥睇蓬萊隔弱水
金丹何日乞刀圭
聊跨白鴻三萬里
朋舊有以前韻和者
再韻答之

觀光瑩瑩京華客
十千沽酒春壺碧
酒酣濯足新豐歌
眼底嵩華滄溟窄
欣然一笑來我傍
共談詩傳春風香

興豪磊落出奇語驪珠落袖搖光芒不須偃蹇衡門裡
氣槩匣中三尺水名駒未肯伏鹽車會見權奇日千里
賀歐陽公除翰林學士

高寒禁暑含冰玉瀛洲老仙巖電目袍錦團團紫鳳花
帽光隱隱青螺粟絲綸夜半催宣布香艷宮壺新雨露
硯池一滴紫毫春霽霏恩波遍寰宇

呈揭曼碩監丞

玉皇案吏來青冥夜捧紫詔飛雲駟天章絢爛五就采

光氣直向奎躔明雄才獨擅燕許手照世奕奕垂高名
大篇春容金玉振醉墨光怪雲烟生門人執筆漱芳潤
變化總作中朝英嗟余觀光老賓客辦香仰止懷生平
焦桐倘許奏流水古意或可追醜顧公風誼薄霄漢
邂逅定見雙瞳青西清邃閣不可近何日暫借蓬瀛登

次韻湖亭秋望

紅衣老盡玻璃國孤嶼人烟落秋色豆花過雨水風涼
落日殘蟬疎樹碧雁天紺滑秋雲淨玉函炯炯開寒鏡

蟾枝香冷酒微醒
長笛一聲無盡興

冷泉亭

昔人來自天竺國
縹緲孤雲伴飛錫
天風吹落凝不去
化作奇峯聳空碧
至今裂峽餘雲髓
桂冷松香流未已
翠光圍住玉壺秋
不放晴雷度山趾
道人宴坐無生滅
炯炯層胸照冰雪
夜深出定汲清冷
寒猿啼斷西巖月

次韻程渠南春日

阿咸歸叩山中扉
袖出巨軸當春輝
粲然光態轉流麗

妬婦誰敢憎蛾眉雄辭竒險神鬼愕瘦字光怪蛟蛇飛
多君書暇追勝集意氣豪爽驚愚癡前川花柳寓真樂
心契往古夫何疑哀余亦有風雲興兀坐一室嗟奚為
誦君妙句音何希白社今見元微之

題潘好古詩卷

繫古道之久混兮謂涓濁而涇清耳所適以是悅兮紛
瓦釜兮雷鳴豈大雅之不作兮由世尚之所徵何獨子
之好古兮得非誇節而特行念朱絃之既絕兮豈鸞膠

之足憑諒吾撲之弗鑿兮又何恤乎虧成振寥寥之孤
響兮嗟彼聾俗而疇顧當鄭衛之聲哇兮乃獨唱乎咸
獲惟心遊於太古兮發冲泊之天趣將抱瑟而從之兮
爰寫余之中素貯落月之遺音兮渺松風於秋曙

徐雪樓負樂亭

雙溪之流兮何沄沄溪之山兮何嶙峋亭之築兮溪之
濱趾白石兮顛蒼雲懷費張兮壯且文孰貽名兮匪賓
世所樂兮崇貨珍子乃反是兮樂以貧子之場兮有菌

子之甑兮無塵雖偈偈均約素兮能不汨乎物遷豈好
修以矯行兮余疑信之未分子繩其樞兮衡其門酌溪
淥兮毋甘而尊頰潛魚兮仰飛鳶妙化機兮道所存目
擊心會兮奚託於言將忘物我兮內適以真邈悠悠於
千載兮顏哉何人

和樵

山深兮林密石聳兮徑微薪之兮樵之冒嵐雨兮躋款
危木臃腫兮難伐仰難挽兮喬枝俯榛棘兮離離刺吾

手兮勾吾衣憇佳蔭兮太息睇白雲兮自怡顧人生兮
良勤維富貴兮多違龜曳尾兮斯樂鶴斷脰兮則悲聊
徜徉兮委順我忘世兮世寧我知日云夕兮淒烟霏嘯
山鬼兮號狐狸歸兮歸兮毋遲遲余需子兮溪之湄

棲碧

此山山人樂乎棲碧之趣乃為歌曰紅塵擾擾兮毋將
車白雲邃幽兮山之隅地偏兮心遠爰處兮爰居種菊
兮滿徑植梅兮繞廬竹娟娟兮堂下草蔚蔚兮庭除操

風瓢兮酌春酒躡露履兮鋤秋蔬涉芳洲兮采杜若汲
清泉兮淪雲腴聽松聲兮宴坐和樵歌兮嘯舒外視兮
不足內樂兮有餘彼失此得兮何異於夢鹿朝三暮四
兮奚取乎詐狙窮兮未必非達親兮亦或為疎樗臃腫
兮全天年驥權竒兮困馳驅客有過余而和之曰維子
之樂兮固放情於丘壑逢時之清兮胡不徼世之名譽
既隱居以求志何語怪而言迂不若忘言以棲碧吾將
從子兮維吾駒

題張子敬墨竹圖

翠琳瑯兮楚楚風蕭蕭兮在戶
運滴水於毫端兮散淇澳之烟雨

題施德趣怪松圖

奮蒼髯於絕壁兮倚天骨之崢嶸
偃高高之絕素兮俄颯颯其風生
勢摧減而憑陵兮吾恐雷雨之晝冥

湘江觀潮

錢塘江上風颼颼誰驅逆水回
西流海門山色暗蛾綠

翁忽瀕洞驚吳艘飛廉賈勇吐神變倒掀滄溟躍天半
闐闐霹靂駕羣龍高擊瓊崖捲水岸初疑大鯨噓浪來
瀛洲銀山雪屋爛不收又疑當時捍築射强弩至今水
戰酣貌貅溪盈壑滿留不住怒無洩處潛回去乘除消
長無停機斷送人間幾朝暮吳儂何事觀不休落日蒼
波萬古愁汀蘋沙雁年年秋海雲一抹天盡頭

次韻春日即事

吳蠶欲老疇未秧拍隄野水迴橫塘淡烟疎樹綠陰薄

落花飛絮白日長寒具油乾過冷節
怱怱芳事歸鷓鴣
枕書唾足午窻明雪乳浮浮翻兔褐

淮東早發

扁舟早發淮東城城頭急鼓催殘更
水田漠漠白鴈落
老樹慘慘羣鳥驚
簞翁筇婦溢羣蟻重湖捲葑聯雲平
青旗茅屋競呼酒老我一醉消春醒

聽泉席上賦茶藤

脩條盤出籠春碧滿架花開春院寂
青蛟脫骨翠波寒

玉練搖光紺雲密東風清潤曉闌深襟袖飄飄蘭麝濕
典型元在酒杯中搖碎瓊筵和露吸

題程南渠詩卷


前年挾策登燕臺豹關天北高崔嵬九衢冠劍擁紅霧
四時鼓吹酣晴雷今年歸踏蒼山雪白雲與我情相悅
窮簷掃軌澹無營飯牛依舊柴門月美人久別心所懷
屐齒不印山中苔劃然奚囊隨棊几五色照我雙眉開
千林搖落嗟歲晚大雅寥寥國風遠驪黃色外得騅駘

盆盎叢中出圭瓚銀鈎翠薤相屈盤清輝薄我襟袖寒
修鯨勇掣海濤緊錦段未許輕卷還懷哉吾道隨舒卷
八風低翅從渠短何時握手話雄襟為碾春雲翻雪盃

桃源圖

千重萬重蓮瓣山小天包在山中間神椎鑿門石扇裂
冷香迸出桃花灣漁郎尋春踏溪尾撞入桃花小天裏
荒邨人家無幾家五百年來孫換子不邑不城無憂鄉
駕雲為屋霞為牆丹雞叫烟桂巖冷白牛耕雨芝田香

眼中驚見塵中客持酒爭來問鄉國鹿走荒山西復東
龍渡長江又南北聽闌此語意猖狂月明假榻松間房
明朝出山重回首山迷水亂雲茫茫武陵太守意未省
強要尋源造靈境若使靈境長可通淳俗定變澆漓風



此山詩集卷五

欽定四庫全書

集部
此山詩集卷六至十

詳校官中書臣李彤

侍讀臣孫球覆勘

總校官編修臣王燕緒

校對官中書臣宋鎔

謄錄監生臣任紹濂

欽定四庫全書

此山詩集卷六

五言律詩

溪邨即事

寒翠飛崖壁塵囀此地分
鶴行松徑雨僧倚石闌雲竹
色溪陰見梅香岸曲聞山
翁邀客飲閒話總成文

曙岩上人

巖扉人不到竹色滿僧闌
林雨添經潤牕雲入硯
寒夜龕猫占卧晨鉢鶴
分餐客至無餘事敲冰
煮月團

答張渭濱

與子三年別相思日幾迴
攜琴松下石沽酒隴頭
梅驛遠詩難寄山深雁
不來渭濱千畝竹瞻滌
重徘徊

過上居

數里榕陰合迢迢過客
稀溪烟桑子熟山雨藥
苗肥牕冷雲侵坐琴清
月在扉怡然無俗事我
已早忘機

贈別

之子梁園彥才華迥不羣
書燈雙鬢雪野飯一犁雲
久病憐為客多愁忍送君
鍾山吾舊隱不用勒移文

訪張山民

又攜詩卷出幾度不逢君
枯沼肥添雨寒松暖借雲
山牕多樹色石徑老苔紋
後夜梅應發清樽擬共分

次韻古琴上人

曳杖雲中寺嵐生古殿陰
泉冰冬澗澀山雨夜鐘沈
酒

熟邨家近梅開野岸深松風千古意留客聽清琴

野趣

地偏居自穩石路接平田雲合茅簷樹雨添花澗泉空
山晴滴翠遠水綠生煙喚酒青林渡斜陽繫客船

贈別

南鴈歸應盡攜書始問程別離情易惡貧賤意難明樹
色春城暗鐘聲曉寺清孤燈山驛酒後夜共誰傾

曉望

極目秋無際，寥寥倦客心。
幽琴蒼樹合，野棹綠荷深。
露涵清曙殘，雲破遠陰新。
涼無限，興攜杖向東林。

僧舍逢故人

空寂禪棲地，蹉然偶盍簪。
關河千里道，風雨十年心。
歸鶴投松暝，流螢度竹深。
絕憐清夜興，話舊不成吟。

倦遊

萬事雙蓬鬢，江山賦倦遊。
斷猿明月曙，踈雨碧梧秋。
道路中年感，琵琶後夜愁。
客懷無處寫，離思滿滄洲。

野寺

艤棹投蘭若逢僧話白頭百年王謝燕萬里海翁鷗流
水山門古閒雲野殿秋夜深鐘磬絕鶴唳楚山幽

宵征

野路無郵傳迢迢第幾程天河山外落江月水中行客
久衣偏冷車單馬易驚前津分曙色依約有農耕

次韻江德華

酷為吟成癖憐君帶眼寬親闈方念遠客路早知寒疎

樹蟬聲雜長空鴈影單悠悠江漢濶樽酒寫情歡

郭外

郭外人家少漁邨颺酒旗江雲低壓樹沙竹細穿籬地
暖梅花早天寒潮信遲夕陽烟景外倚杖立移時

意行

約畧三家市溪迴野路分輕暎晞竹露宿雨落松雲山
寺依巖見邨舂隔塢聞欣欣農事集聊得狎鷗羣

社日

端居忘節序物化靜中觀遠岫春雲淡深村社雨寒溪
花紅映屋階樹綠平闌喧醉田間叟雞豚日暮歡

山莊夜宿

岸幘閒舒嘯襟懷爽似秋荷深香細細雲澹意悠悠流
水空山靜殘蟬綠樹稠偶來成獨宿涼月夜當樓

卜隱次韻

養鈍習成癖居貧道已聞蒲團延客話芋火就僧分林
潤夜疑雨牕寒曙拂雲聚聚牆下菊書暇亦鋤耘

來雲僧舍

聯雲開佛屋接竹引巖泉路滑迷霜葉鐘寒濕曙烟有
為皆是幻無想總成禪夢覺僧簷雨重來又十年

次韻錢濟川

甍艤東風棹相逢漢水濱一尊東峴酒萬里北歸人柳
拂官橋曉花明驛路春明朝又山嶽悵別漫勞神

次韻江德華

寂寞山陽市相歡把酒卮江湖千里客風月一囊詩渡

晚歸人少沙寒落鴈遲
明朝淮水隔何處寄相思

沈雲趣

逃名蕭散客結屋跨雲根
風月供千首乾坤寄一樽
孤鐘臨水寺長笛落梅村
讀易筠窻下超然隔世喧

嵇子安遷居

半世相東客欣然遂卜居
澹烟沙外徑明月竹邊廬
潦縮寒溪淨秋高老樹疎
別來無便雁為況近何如

汪良甫夜飲

瀟灑一杯酒臨風寫素琴潮生春浦暗月落夜城沉拂
曙星河淡含烟草樹深長歌休語別華髮欲盈簪

次韻王可道

楚楚山陰彥長遊楚水濱尺書新寄鴈十載幾懷人客
夢蘆花雨詩情柳絮春何時歸話舊沽酒薦吳蓴

再次邵本初韻釣臺

羊裘人已遠猶說漢江山不為三公貴輕拋半日閒遺
臺蒼樹杪清瀨白雲灣千載惟鷗鳥相看不厚顏

和同舟葉宰韻

邂逅南歸客扁舟共問津
一尊風月興萬里水雲深
京洛紅塵舊功名白髮新
新看吾道泰梅報一枝春

客中送張歸雲

相逢俱是客對酒感流年
落日沙頭鴈清風樹杪蟬
山鐘隔林寺江火趁潮船
何日茅簷下清燈話雪川

北山詩集卷六